

DECLARATION
DV ROY SVR L'AR-
REST FAIT DE LA PERSON-
ne de Mons^r le Prince de Con-
dé, & sur l'esloignement de sa
Cour, des autres Princes, Sei-
gneurs & Gentils-hommes.

*Publiée en Parlement, le septiesme
Septembre, le Roy y seant.*



A PARIS,
Chez F. MOREL, & P. METTAYER, Im-
primeurs & Libraires ordinaires du Roy.

M. D C. XVI.

Case

F

39

1326

1616fs2

THE NEWBERRY
LIBRARY



LOUIS PAR LA GRACE DE DIEV, ROY DE FRANCE ET DE NAVARRE, A tous ceux qui ces presentes lettres verront, Salut.

C'est avec vn regret incroyable & qui nous perce le cœur, qu'il faille que si souuēt nous employons nostre auctorité, pour reprimer les mal'heureux desseins de ceux qui cherchent en la ruyne de nostre Estat l'aduanacement de leur fortune, & dans les prodigieuses cruauitez des guerres ciuiles, la licence de tout ce que les loix & la raison leur deffend : Et encores plus quand il faut que les necessaires remedes que nous apportons à la seureté de nostre personne & salut de cest Estat, diffament & des-honnorent nostre propre sang, & le rendent coupable d'impieté, tant enuers nous qui tenons lieu de pere enuers tous nos subiects, que enuers

leur commune patrie, qui est reuere comme mere par les peuples les plus barbares. C'est neantmoins ce qui nous arriue aujourdhuy, quand nous mettons au iour les iustes plaintes que nous faisons tant contre nostre Cousin le Prince de Condé, que contre les Princes, Seigneurs, & autres qui adherent aux mauuais & pernicieux desseins qui ont esté ourdis contre nostre personne & nostre Estat: estant impossible que ceux qui considereront d'vn costé nostre desmesuree clemence, tant de fois employée à les gaigner & acquerir, & d'autre leur indomptable opiniastrété à nous offencer, voire ruyner, ne detestent avec horreur vne si ingrate mescognoissance. Lors que dernièrement ils s'esleuerent en armes, sous pretexte d'empescher la plus honnorable alliance que nous pouuions prendre en toute la Chrestienté, & pour reformer nostre Estat par son entiere ruyne, Nous pouuions aisément avec vn peu de patience les voir fonder & se consumer de soy-mesmes pour retomber à nos pieds & estre reduits à nostre misericorde. Mais iettans les yeux sur les miseres & calamitez qu'ils faisoient souffrir à nos peuples, Nous auons voulu comme pere pitoyable payer la rançon de nos

pauures subiects par la diminution de nostre auctorité, par l'extreme incommodité de nos affaires, & euident dommage de nostre Estat. C'est pourquoy par le Traicté de Lodun nous accordasmes à nostredit Cousin tout ce qu'il nous demanda ; Nous ne luy laissasmes pas seulement le Gouuernement de Berry, mais nous recompensasmes cheremēt toutes les places fortes qui y sont, & tout le Domaine pour le luy bailler, & accordasmes ou pour gratifications, ou pour licenciement de ses troupes, des sommes si immenses que les despenses de ceste guerre, ou du Traicté, nous reuiēēt à plus de vingt millions. Pour contenter nostre Cousin le Duc de Longueuille nous auons tiré de la Picardie & de la Citadelle d'Amiens ceux qui y commandoient, pour y mettre personne qui luy peust estre agreable : & pour luy donner plus de subiect de se rapprocher de nous, faict esloigner ceux que nous croyons qui luy estoient des-agreables. Nous auons donné à nostredit Cousin le Prince de Condé, lors qu'il est venu vers nous telle part qu'il a desiré au maniemēt de l'Estat, & particulierement la direction de nos finances, bien que ce fust chose qui semblast alliene de sa qualité, & que chacun

ingéoit preiudiciable à l'Estat. Toutesfois les excès de nos graces & faueurs n'ont peu retenir les volontez desordonnées de ceux qui ne trouuent leur repos que dans les troubles de nostre Estat, & ne mettent leur esperance qu'en nostre ruine : Car & deuant & depuis l'arriuee dudit sieur Prince, ont esté tenuës plusieurs assemblees nocturnes en nostre ville de Paris, mesmes à S. Martin Deschamps, & aux faux-bourgs S. Germain, où se sont trouuez des Princes & autres des plus grands qui feussent près de nous : & mesmes aucuns de nos Officiers dont les vns se sont depuis retirez, aduouans leur crime par leur fuite. A la suite de cela, ont esté faictes practiques & menées pour desbaucher le peuple, & l'esmouuoir à sedition, & pour gagner ceux qui auoient charge des armes en ceste nostre bonne ville, comme Collonels & Capitaines, & ce sur diuers pretextes : à quoy ont esté mesmes employez plusieurs de nosdits Officiers. L'on na point aussi oublié de practiquer les Curez & Predicateurs, ausquels on a faict tenir des langages scandaleux, non plus que les Seigneurs & Gentils-hommes qui estoient autour de nous, & cela si ouuertement que ceux qui faisoient telles menées,

n'ont point eu craincte de faire dire à la Royne nostre tres-honnoree Dame & mere, qu'ils estoient tellement liez, que rien ne les pouuoit separer, leus seruiteurs & sui-uans disans publiquement que nul que Dieu ne les pouuoit empescher de changer le Gouuernement. En suite de cela seroit arriué le faisissement & occupation de la ville & Chasteau de Peronne, dont les Conseils ont esté tramez près de nostre personne: de-quoy bien que nous eussions iuste occasion d'estre grandement indignez, & avec la force venger l'iniure qui estoit faicte à nostre auctorité: neantmoins nous nous serions accommodez à toutes les propositions qui nous auroient esté faictes pour composer doucement cét affaire. Mais au lieu de faire proffit de nostre bonté & indulgence, il seroit entré dedans quatre compagnies de gens de pied, tambour batant, parties des places commandées par ceux qui estoient près de nous & qui trempoient à tous ces desseins. Ce qui auroit tellement dépleu à tous ceux à qu'il restoit encore quelque respect de nostre auctorité, qu'une Princeesse qui attouche de fort pres ceux qui estoient interessez en ce faict là; touchée de la compassion de nostre fortune, auroit donné ad-

uis à la Royne nostredicte tres-honorée Dame & mere, des desseings des entrepreneurs : & nous auroit fait aduertir de prendre garde à nous, d'autant que leurs conseils tendoient à se saisir de nostre personne, & de la Royne nostredicte Dame & mere, & se cantonner par toutes les Prouinces de nostre Royaume: dont toutesfois l'horreur auroit esté si grand en l'ame de ceux qui y auoient trempé, que mesmes nostredit Cousin auant sa detention, auroit ingenuement confessé à nostredicte Dame & mere, s'estre trouué audit conseil : Et qu'à la verité nous auions occasion d'auoir soupçon de luy, adioustant que toutesfois nous & nostredicte Dame & mere, luy estions obligez autant qu'à nos propres peres. Lesquelles mesmes parolles auroient esté aussi dictes à ladicte Dame par vn autre Prince, la priant de n'en point faire de semblant, de peur que nostredit Cousin ne se retirast. Et de fait nous auions délibéré, en dissimulant, laisser les auteurs de telles broüilleries par nostre patience, & les ramener à leur deuoir: mais nous feusmes incontinent aduertis de toutes parts, que nonobstant la Declaration de nostredit Cousin, il ne laissoit pas avec ses adherans, de persister en leurs mauuais desseins :

seings. De sorte qu'un des grands de nostre Royaume vint vers nostredicte Dame & mere, luy reueler qu'il auoit esté en l'un desdits conseils, où il se traittoit de se saisir de nostre personne, & s'emparer du Gouvernement de l'Estat. Et en mesme temps un autre de semblable qualité, auroit enuoyé à nostredicte Dame & mere, un Conseiller de nostre Parlement, pour nous donner aduis desdites entreprises. Et depuis encores seroit venu luy mesmes, & nous auroit coniuéré de pourueoir à la seureté de nos personnes, protestant qu'il le disoit pour la descharge de sa conscience : adioustant que l'armée qui estoit à Peronne eust esté mieux auprès de nous, & qu'il eust désiré que nous eussions esté hors d'icy au milieu de douze cens cheuaux. Un des principaux Prelats de ce Royaume, & qui estoit entierement hors de soupçon de vouloir rien feindre en ceste occasion, nous vint aussi aduertir qu'on proposoit parmy les auteurs de ces desseings, d'aller à nostre Parlement reprendre les erreurs de l'Arrest, par lequel on auoit ordonné que les Princes, Pairs de France, & Officiers de la Couronne, seroient conuoquez pour pourueoir au Gouvernement, & là proposer de nous l'oster. Et ces choses estoient desia

si publiques, que les Ambassadeurs des Princes estrangers qui estoient en nostre Cour, nous donnoient aduis par escrit de leurs mains, & sollicitoient officieusement de prendre garde à nous. On nous rapportoit aussi qu'ès festins qui se faisoient parmy ceux qui suiuoient nostredit Cousin, c'estoit vn terme d'allegresse ordinaire Barre à bas, pour dessigner sa pretention à la Couronne. En mesme temps nous sçauions que de tous costez on leuoit des forces en nostre Royaume, sans nostre permission, & sur les commissions de ceux qui estoient près de nous, & en saison qu'on ne pouuoit prendre pre-texte que ce fust pour s'en seruir ailleurs. Cela avec telle licence que le iour auant que nous ayons faict arrester nostredit Cousin, il fût tiré de ceste ville de Paris des armes pour armer trois mil hommes. Nostre patience enfin vaincuë par l'euidence du peril, qui ne regardoit pas seulement nostre personne, mais trainoit apres soy l'entiere ruine de nostre Royaume, qui nous est plus cher beaucoup que nostre vie, nous nous sommes retournez vers Dieu, & apres auoir, comme en chose desesperée imploré son assistance & conseil, nous auons trouué n'y auoir plus autre remede à ce mal, que de

nous asseurer de la personne de nostredict Cousin, bien que nous cognussions assez le hazard que nous courions par les menees & practiques, avec lesquelles on auoit de long temps alliené les cœurs & volentez non seulement de nos subiects, mais de nos propres Officiers & seruiteurs. Nous l'auons doncques faict arrester, & loger prez de nous en nostre Chasteau du Louure, avec le plus honorable & fauorable traictement que telle occasion pouuoit souffrir. Et pour ce que par ce que dessus nostredict Cousin, & ceux qui luy ont adheré, ont manifestement viollé la foy qu'ils nous auoient donnée, & contreuenue en toutes façons audict Traicté de Lodun, comme ils auoient faict à celuy de Sainte Menehoud par l'entreprise de Poictiers, comme il est veriffié par l'information de plus de cent cinquante temoins dignes de foy: nous ne doubtons point que selon que les esprits sont miserablement partialisez & preuenus de diuerses passions, beaucoup de gens mal affectionnez à nostre seruice, & au bien de nostre Estat, ne veuillent donner de sinistres interpretations à cest euenement: Nous auõs voulu par ces presentes esclaircir vn chacun de nostre intention, & pourueoir quant &

quant à ce qui est de la seureté de nostre Estat & bien de nos subiects ; & leur faire cognoistre que nostre bonté & clemence ne peut estre vaincuë par leur obstination. Et pour cest effect, S C A V O I R F A I S O N S, Qu'apres auoir mis cet affaire en deliberation en nostre Conseil, où estoient la Royne nostredicte Dame & Mere, aucuns Princes, Officiers de nostre Couronne, & autres principaux Seigneurs de nostredict Conseil, & de l'aduis d'iceluy, Nous auons déclaré & declavons par ces presentes signees de nostre main, que par la detention & arrest faict de la personne de nostredict Cousin, nous n'auons entendu ny entendons en façon quelconque contreuenir à nostredict Traicté de Lodun, ny priuer aucun de nos subiects demeurant en nostre obeissance, du fruiet & benefice d'iceluy, lequel nous voulons estre inuiolablement gardé, pour le regard de tous nos subiects qui sont demeurez en leur debuoir & en nostre obeissance. Et pour d'abondant exercer enuers eux nostre clemence, Voulons, & nous plaist que tous ceux qui ont adheré à nostredict Cousin, & aux desseings & conseils qui ont esté pris & tenus contre nostre Estat, reuenants à nous dans quinzaine

apres la publication des presentes en nos
 Parlements, & nous en demandans pardon,
 n'en soient en facon quelconque recher-
 chez : abolissant en ce cas tout ce dont ils
 pourroient estre coupables : promettant
 les reprendre en nostre grace. Comme aussi
 en cas qu'ils perseuerent en leur faulte, les
 auons declarez & declarons criminels de le-
 ze Maiesté : voulons estre proceddé contre
 eux suiuant la rigueur des loix, & de nés E-
 dictz & Ordonnances. SI DONNONS EN
 MANDEMENT à nos amez & feaux Con-
 seillers les gens tenans nos Cours de Parle-
 ment, Baillifs, Seneschaux, ou leurs Lieute-
 nans, & à tous autres nos Iusticiers & Offi-
 ciers qu'il appartiendra, chacun endroit
 soy, que ces presentes ils verifient & facent
 enregistrer, publier, garder & obseruer se-
 lon leur forme & teneur : & à nos Procu-
 reurs generaux desdites Cours, faire toutes
 poursuites & diligences pour l'execution
 d'icelles. CAR tel est nostre plaisir. En tes-
 moin dequoy nous auôs fait mettre nostre
 seal à cesdites presentes. DONNEES à Paris,
 le sixiesme iour de Septembre, l'an de grace,
 mil six cens seize, Et de nostre regne le sep-
 tiesme.

Signé,

LOVIS.

Et plus bas, par le Roy, DE LOMENIE.

Et sceellées du grand seal de cire jaulne en double queuë.

*Leuës, publiees & registrees, oy
& ce requerant le Procureur Ge-
neral du Roy, & ordonné que cop-
pies collationnées seront enuoyées
aux Bailliages & Seneschaussees
pour y estre semblablement leuës, pu-
bliées, registrées, gardées & obseruées
selon leur forme & teneur. A Paris
en Parlement le Roy y seant, le sep-
tiesme Septembre mil six cens seiZe.*

Signé,

DV TILLET.



